

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Dampa biala by-election chuh tura hming pek luh ni hnukung vawin khan PC Party Vice President Pu K. Zahmingthanga nomination a theluta a, kil 5 atangin inchuh a ni dawn ta.
- 2. Nov ni 11-a Dampa Assembly bial inthlan vote thlak tur atana vote zawn beihpui ngawrh chhoh mek a ni.
- 3. Prime Minister Narendra Modia chuan khawvelin chhiatna hrang hrang thlang karah India chu nghet takin a ding a ti..
- 4. Takaichi Sanae chu Japan hmeichhe Prime Minister hmasa ber atan thlan a ni.

<><><>

DAMPA NOMINATION

Dampa biala by-election chuh tura hming pek luh ni hnukung vawin khan PC Party Vice President Pu K. Zahmingthanga, Sakawrtuichhun, Aizawl chuan nomination a theluta a,

Heti hian he bial chuh tur hian candidate 5 an awm dawn a. Hming pek luhte hi naktukah endik a ni anga, candidate-te inhnudawh theih hun hnukung atan tun thla ni 24 ruat a ni.

Dampa Bial Assembly By-election neih tura chuh tumte tana hming pek luh hun hi vawin chawhnu dar 3 khan khar a ni.

PC Party Candidate Pu K. Zahmingthanga chuan, kan corr zawhna chhangin tlin inbeisei lutuk lova ding anih thu a sawi a, Zoram mipui ten kawng diklo an zawh nasa tawh em em a, mi pahnih khat talin an lo harhchhuah theih phah nan a ding niin a sawi a ni.

(Byte - K Zahmingthanga, PC Party candidate)

Dampa Bial Assembly By-election hi kil 5 atanga chuh a ni dawn a, BJP Party chuan kum 2023 a he lai biala Congress candidate, tunhnai a an party zawmtu Pu Lahmingthanga chu an vawrh chhuak a, Congress in Minister hlui Pu John Rotluangliana an candidate a. MNF chuan an party senior vice president leh Minister

hlui Dr. R. Lalthangliana dintirin ZPM atangin kum 2023 inthlana tling zo tawh lo Pu Vanlalsailova an din nawn tir leh bawk a ni.

Dampa assembly bial bye-election a tul chhan chu July ni 21-a helai bialtu MLA Pu Lalrintluanga Sailo MNF a thih vang a ni a. Bye-election atan hian November ni 11 khian vote thlak a ni ang a, November ni 14-ah vote chhiar a ni dawn a ni.

Dampa Bialah hian vote thlakna hmun (polling station) 1,276 a awm a, Dampa Bial chhungmi vote nei mipa 10,605 leh hmeichhia 10,185 bakah, service voter mipa 111 leh hmeichhia 4 an awm a; vote nei zawng zawng hi an vaiin mi 20,905 niin, mipa 10,716 leh hmeichhia 10,189 an ni.

<><><>

DAMPA ELECTION CAMPAIGN

Nov ni 11-a Dampa Assembly bial inthlan vote thlak tur atana vote zawn beihpui chu Political Party hrang hrang ten ngawrh takin an thlak mek a,

ZPM Leader, Chief minister Pu Lalduhoma chuan vawiin khan ZPM Dampa West Block Campaign chu New West Phaileng-ah hawng a; Dampa bial mipuite chu opposition MLA bial atanga ruling MLA bial ni thei tura party bik sawi loa ZPM candidate vote theuh turin a sawm.

Pu Lalduhoma chuan, Dampa bial chu India rama district hnufual leh changkang lo, aspirational district a ni a, hemi atang hian ZPM chuan Mamit district chhanchhuah an duh a ti a; opposition bial atanga ruling biala awm ve tur in a sawm a ni.

Dampa bial by-election neih turah BJP Party tan campaign turin Union Minister Kiren Rijiju chuan naktukah zan khat riakin Mizoram a rawn tlawh dawn a, West Phaileng pan nghalin vantlang inkhawmah thusawiin bialchhunga mi hrang hrang a kawm dawn a, tlai lamah Aizawl lo letin Hotel Regency ah thuthar thehdarhtute a kawm dawn a ni.

Pu Rijiju hian naktukah Reiek a tlawh bawk anga, Reiek ah hian vantlang inkhawm a hmanpui dawn bakah Dampa Bial by-election atana BJP campaign hun ruat hrang hrang a hmanpui dawn a ni.

MPCC President Lal Thanzara chuan Dampa bial a bye-election campaign neiin Kanghmun-ah vawiin khan hun a hmang.

MPCC President Lal Thanzara chuan Congress Party chu inthlan dawna an party intiamna tihlawhtling thin an ni tih sawiin tuna sawrkar mekte leh MNF ten an intiamna an tihlawhtling ngai lo a ti.

Kawng a chhia a lirthei khalhtute an nuar a, Bana Kaih ah te pawh mipuite an beidawng em em a. Central Scheme awmsa an mahni siam angin an sawi mai a. Congress Party chuan NLUP an scheme siamkan sawi a, an tihlawhtling a, chhungkua nuai khat leh sing li chuang NLUP hmangin an chhawmdawl a ni a ti.

ZPM Sawrkar chuan sum leh pai an nei lo tih sawiin Pu Lal Thanzara chuan Central sawrkar an dawr a, BJP sumin an campaign a, an intiamna ang an tih leh loh avangin Central Sawrkar in an hrek mek a ni, a ti.

Ramchhungah BJP an kal na em em a, chu chu an Hindu puite pawhin an duh lo tih sawiin Pu Lal Thanzara chuan Congress boruak chu India ramah a tha tawh em em a ni, a ti.

Dampa bial bye-election a MNF official candidate MNF Senior Vice President Dr. R. Lalthangliana chuan Dampa West leh Dampa South Block khaw hrang hrangte a fan chhuah hnuin nimin khan Phuldungsei PHC a tlawh a. Phuldungsei PHC-ah hian IV Grade hnathawk pawh an awm lo a, thawktute an indaih lo hle a, khawtlang mipui an buai hle bawk a ni a ti a. Marpara leh West Phaileng PHC-te pawh tlawhin thawktu indaih loh avanga an manganna leh thawktute harsatna tawh hrang hrang a takin a hmuhpui tih a sawi a ni.

Dampa bial chuMamit District huam chhunga awm a nih angin, thlan tlin a nih chuan bial chhung khaw hrang hranga PHC leh Sub-Centre te pawh Aspirational District a nihna hmanng tangkaiin, hriselna lamah hmasawnna a awm theih nan leh Staff indaih lohna avanga bial mipuiin harsatna an tawh thin sukiang tura theihtawp chhuah a tum thu a sawi.

Mizoram Sorkar chuan health sector lam chu mihring thih leh dam inkar a nih avangin ngaihsak bik se a duh thu a sawi bawk a, Phuldungsei, Marpara leh West Phaileng PHC te manganna leh harsatna te hi ZPM Sorkar in a rang thei ang bera an ngaihsak a phut tih a sawi a ni.

<><><>

CEO

Chief Electoral Officer Dr Lalrozama chuan November ni 11 Dampa Bial MLA By-Election neih tur atan tluang takin inbuatsaihna a kal chho mek a ti a; inthlan hun puan atanga vawiin thlengin inthlan inkaihhruaina, Model Code of Conduct kaihhnawihah zualkona a la awm loh thu a sawi.

Dr Lalrozama hnen atanga Akashvani Aizawl thudawn danin, Dampa bial mipui, political party, NGO leh sorkar inkarah thawhhona tha tak a awm thu sawiin, inthlanna hlawhtling tak awm ngei se a duh thu a sawi a ni.

MCC chungchangah complaint nei tan ziakin inthlan kaihhnawih sorkar hotute hnenah a thlen theih thu sawiin Dr Lalrozama chuan, cVIGIL mobile app hmangin android leh ISO phone hmangtuten hmun leh hmun atangin complaint duh an neihte chu a thlalak leh video-te nen an thehlut thei a ti a, cVIGIL chu hmang tangkai theuh turin mitin a ngen nghal bawk.

Election lam atang chuan Political party tinten rualkhai tak leh inbuktaw takin campaign-na hun leh hmun tha nei se tih chu an duh dan a nih thu Chief Electoral Officer chuan a sawi a; tun dinhmunah chuan political party-te pawhin tha takin dan hnuaiah campaign an kalpui nia an hriat thu leh an lawmthu a sawi a; complaint an dawn erawh chuan a rang thei ang bera hma la nghal turin flying squad an indah vek thu a sawi.

(BYTE)

Dr Lalrozama chuan political party tinin star campaigner 40 theuh an inruat theih thu leh CEO-ah an star campaigner turte list an thehluh tawh thu a sawi a; ECI

lam atangin hotu pathhumin Dampa bial an thlen tawh thu leh anni pawhin an tih tur angte tluang taka an tih zel an beisei thu a sawi bawk.



POLICE COMMEMORATION DAY

Vawiin October ni 21 hi an duty laia thi police-te s̄unna hun 'Police Commemoration Day' a ni a, rampumah hman niin, Mizoramah pawh hmun hrang hrangah hman a ni.

Aizawlah chuan 1st Bn. MAP Headquarters, Armed Veng, Aizawl-a martarte thlanah DGP Anil Shukla hoin police thite s̄unna leh zahna chibai b̄ukna hun hman a ni.

Commemoration Day-ah hian India rama September ni 1, 2024 leh August 31, 2025 inkara duty laia police thi mi 191-te hming chhiar chhuah a ni a, anmahni s̄unna hun hman a ni. Kum 1966 atanga nimin thlengin Mizoram Police zingah, duty laia nunna chan mi 54 an awm tawh a ni.

Aizawla Commemoration Day hmannaah hian Mizoram Police senior officer-te bakah CRPF, SIB leh Assam Rifles atanga officer pawimawh lo kalte nen urhsun takin martarte sunna neih niin, martar thlanah zahna pangpar dah a ni a; Mizorama Police hmunpui hrang hrang, District Headquarters leh Battalion Headquarters-ahte Commemoration Parade hi hman a ni bawk.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



OPERATION AGAINST DRUGS

Mizoram sorkar leh Central YMA tang dunin ruihhlo do beihpui an thlakna, 'Operation Against Trafficking and Use of Drugs and Narcotics' hnuaiah ni 50 chhungin Mizoram Police-te chuan cheng nuai 1,610 man hu ruihhlo an man tawh a; he beihpui thlaknaah hian ruihhlo kaihhnawihah mi 71 man tawhin, heng zinga mi 15-te chu ramdangmi, foreigner an ni.

Ruihhlo do beihpui hi kumin September ni 1 khan Home minister Pu K Sapdanga'n a pisaah a hawng a; December thla thleng kalpui tur a ni a, ruihhlo do beihpui thlak hian a tum ber chu Mizoram leh Myanmar inrinna chhehvela ruihhlo rawn lut thinte danchah a ni.

Mizoram Police chuan ruihhlo do beihpui thlakna kal mek chu tun aia a lo hlawhtlin lehzual theih nana thawhpui turin mipui an ngen a, thuneitute hnena misual leh ruihhlo tawlh report kawngahte tan la thar a, thahnem ngai taka theihtawp chhuahpui zel turin an ngen bawk a ni



PM

Prime Minister Narendra Modia chuan khawvelin chhiatna hrang hrang thleng karah India chu nghet takin a ding a ti. Diwali puala mipuite lehkha a thawnah he thu hi tarlangin Pu Modia chuan India chu khawvela economy lian pathumna ni turin hmalam a pan mek tih a sawi a. Ram changkanga India siam tur leh Mahni intodelh rama siam turin mitinin ramtan mawhphurhna an nei tih a sawi bawk a. Operation Sindoor chungchang sawilangin India chuan dikna a chawinung mai niloin rorelna dik a thlentir a ni a ti bawk.

<><><>

JAPAN

Takaichi Sanae chu Japan hmeichhe Prime Minister hmasa ber atan thlan a ni. Parliament Diet chuan Pi Takaichi hi vawiin khan an ram Prime Minister atan thlangin hun reiloteah Liberal Democratic Party (LDP) hruaitu hian Japan Innovation Party nen tangrualin sawrkar thar a din dawn a ni.

Prime Minister Narendra Modia chuan Takaichi chu a lawmpui thu social media kaltlangin a sawi a. India leh Japan thawhdunna tinghet zel tura thawhdun pui a beisei thu a sawi a ni.

<><><>